

## Reglur um staðsetningu og útlit auglýsingaskilta í Dalvíkurbyggð.

### 1. gr.

#### Markmið.

- 1.1 Að skilti falli sem best að umhverfi og bæjarmynd Dalvíkurbyggðar.
- 1.2 Að ákveða staðsetningu og stærð skilta og hafa eftirlit með uppsetningu.
- 1.3 Að skilti trúfli ekki umferðaröryggi með staðsetningu og útliti.
- 1.4 Að fullt tillit sé tekið til nágretta, þ.e. nábýlis- og grenndarréttar

### 2. gr.

#### Skilgreiningar.

Með orðunum auglýsing og skilti og öðrum samsvarandi orðum er í reglum þessum átt við hvers konar texta, myndir eða myndverk, hreyfanleg og föst, sem komið er fyrir til lengri eða skemmri tíma á einkalóðum, opinberum svæðum eða mannvirkjum, hvort sem er á spjöldum, borðum eða máluð á húsveggi eða með öðrum sambærilegum hætti og ætlað er að vekja athygli almennings á vörum, þjónustu eða starfsemi hvers konar, hvort sem er á viðkomandi stað eða annars staðar.

### 3. gr.

#### Leyfisveitingar.

Óheimilt er að setja upp hvers konar skilti og auglýsingar til lengri eða skemmri tíma í Dalvíkurbyggð nema með leyfi umhverfisráðs. Byggingarfulltrúi hefur fullt umboð til að afgreiða slík leyfi í samræmi við reglugerð þessa en ber að leggja slík erindi og niðurstöður til staðfestingar í ráðinu.

Vafaatriðum varðandi leyfisveitingar ber að vísa til umhverfisráðs.

Umsækjandi um skilti getur einnig áfrýjað til ráðsins ef hann telur úrskurð byggingarfulltrúa ekki réttmætan.

Ekki er heimilt að staðsetja auglýsingaskilti á áningaplani við þjóðveg 82 sunnan Ásgarðs að undanskildu upplýsinga- og leiðbeiningaskilti sem Dalvíkurbyggð á og hefur umsjón með og er staðsett þar.

Skilti sem byggingarfulltrúi gefur leyfi fyrir til auglýsingar á einstaka viðburðum skulu ekki vera stærri en 0,75m<sup>2</sup>. Auglýsingaborðar í sama tilgangi mega þó vera stærri. Umsækjandi skal tilgreina gerð skiltis, staðsetningu þess, festingar og það tímabil sem skiltið mun standa. Við staðsetningu skal einkum tekið tillit til umferðaröryggis.

#### Undanþegin leyfisveitingum eru:

Auglýsingaskilti á íþróttaleikvöllum með þeim takmörkunum að þau snúi aðeins að áhorfendum og leikvanginum sjálfum og séu eigi hærra en 1,5 metri.

Bráðabirgðaskilti sem auglýsa sölu eða leigu húsnæðis og eru ekki stærri en

0,75m<sup>2</sup> og ekki fleiri en eitt á hverri eign/lóð.

Bráðabirgðaskilti sem veita upplýsingar um nýbyggingar, breytingar eða viðgerðir á mannvirkum séu þau staðsett á viðkomandi lóð og eigi stærri en 3,0m<sup>2</sup>. Á þessum skiltum skulu aðeins koma fram upplýsingar varðandi mannvirkið, þær framkvæmdir sem um er að ræða, upphafstíma og verklok framkvæmdanna og þá sem að þeim standa.

Lausaskilti þ.e. skilti sem ekki eru með varanlegum festingum við jörð eða mannvirki og standa aðeins á opnunartíma starfstöðvar. Stærð þeirra skal ekki vera meiri en 0,75m<sup>2</sup> og standur þeirra hafa innan við 0,5 m radíus. Staðsetja skal lausaskilti við starfsstöð þannig að umferð vegfaranda sé greið og hindrunarlaus. Þar sem skilti eru sett á gangstéttir og stíga skal minnsta óhindraða gönguleið ávallt vera 1,5 m breið. Bannað er að staðsetja lausaskilti á umferðareyjum þannig að þau skerði umferðaröryggi.

Skilti með nauðsynlegum upplýsingum s.s. upplýsingum um öryggisbúnað á hafnarsvæði skulu eigi vera stærri en 3,0m<sup>2</sup>. Staðsetning slíkra skilta skal vera áberandi en jafnframt skal gæta þess að þau skerði ekki umferðaröryggi.

Að öðru leyti gildir kafli 2.5 í byggingarreglugerðar nr.112/2012.

Leyfisgjald er samkvæmt gjaldskrá byggingarfulltrúa.

Ef fyrirmælum byggingarfulltrúa er ekki sinnt getur umhverfisráð beitt ákvæðum kafla 2.4. byggingareglugerðar nr. 112/2012.

#### 4. gr.

##### Umsóknir

Hver sá sem óskar eftir leyfi til að koma fyrir skilti eða auglýsingu skal undirrita og skila inn til byggingarfulltrúa þar til gerðu umsóknareyðublaði.

Með hverri umsókn skal fylgja nafn, heimilisfang og kennitala umsækjanda skiltisins, ásamt eftirfarandi þar sem við á; undirritað samþykki lóðarhafa ef hann er annar en umsækjandi sem og annarra lóðaeiganda og/eða rekstraraðila ef fleiri eru en einn; málsett afstöðumynd og útlitsteikning af skiltinu auk texta sem á skiltinu á að vera

#### 5.gr.

##### Gildistökuákvæði.

Reglur þessar eru settar með heimild í lögum um mannvirki nr. 160/2010

Reglur þessar gilda innan lögsögu Dalvíkurbyggðar og öðlast gildi við samþykkt sveitarstjórnar Dalvíkurbyggðar.



DALVÍKURBYGGÐ

**6. gr.**

**Eldri skilti. Grein til bráðabirgðar, fellur úr gildi ári eftir gildistöku reglna þessara.**

Þau skilti sem þegar hafa leyfi og eru með þeim hætti að sækja hefði þurft um leyfi skv. reglum þessum skulu halda því leyfi í 1 ár frá gildistöku reglna þessara. Innan þess tíma skulu leyfishafar sækja um leyfi fyrir þeim að nýju en ella fjarlægja skiltin. Þau skilti sem sett hafa verið upp án leyfis skulu hlutaðeigandi aðilar hafa fjarlægt innan þriggja mánaða frá gildistöku reglna þessara séu þau leyfisskyld, þó skal heimilt að sækja um leyfi fyrir þeim innan þess tíma.

Brjóti þau skilti, sem um getur í þessari grein bersýnilega gegn ákvæðum um umferðaröryggi er byggingarfulltrúa þá heimilt að láta fjarlægja þau strax.

Samþykkt í umhverfisráði Dalvíkurbyggðar 4. mars 2016.

Samþykkt í sveitarstjórn 15. mars 2016.